



DEO OPTIMO, MAX.  
UNI ET TRINO,

VIRGINI DEIPARÆ, ET S. LUCÆ,  
Orthodoxorum Medicorum Patrono.



QUÆSTIO MEDICO-CHIRURGICA,  
*QUOD LIBETARIIS DISPUTATIONIBUS*  
*manè discutienda, in Scholis Medicorum, die Mercurii*  
*decimâ-nonâ Junii, 1726.*

M. CLAUDIO-ANTONIO RENARD, Doctore  
Medico, Præsîde.

*An cuius ab Acu, Trois carts dictâ, quàm Scalpello & Lanceolâ*  
*Paracenthesis?*

I.

**V**ICTUS ratione, medicamentorum administratione,  
& manu operante, Therapeutice morbos curat; Diætâ,  
Pharmacîâ, & Chirurgiâ constat. In Theoreticam, & Pra-  
cticam ultima dividitur. Theoretica corpus humanum cul-  
tro anatomico perpendit; Practica vulnera sanat, tumores resol-

vit, apostemata maturat, ulcera abstergit, luxationes reducit, fracturas restituit, & methodum operandi docet. Multiplices sunt Chirurgicæ operationes; quinque statuuntur præcipuæ, Synthetis, Diæresis, Exæresis, Prosthetis & Taxis. Inter hæc non minor Paracenthesis abdominis, ad Diæresim simul & Exæresim referenda. Olim Paracenthesis formidabatur; in morbis illam postulantibus vesicatoria, cauteria, escarotica, setacea, & scarificationes anteponebantur. Ita Asclepiades, Leonidas, Hippocrates, Albucasis, Ætius, Paulus Ægineta, Coelius Aurelianus. In posterum non tam immanis hanc Paracenthesim celebrandi modus. Recentiores, primis temporibus, scalpello & lanceolâ utebantur. Ætate autem nostrâ, acus inventa est, *Trois cards* nuncupata, quâ tutius, quâ sine damno, nullâ remanente fistulâ fit Paracenthesis. Sed ut tutò, citò, & jucundè in ascite celebretur, hujus morbi species rectè cognoscenda.

## II.

**P**ARACENTHESIS non inconsultò suscipienda. Hydropes laborantistotum prius abdomen inspicere; utrùm in unum congestæ sint aquæ, an dispersæ hæreant, explora. Si prius; vel ipsum ventris cavum replent, vel in singulari cystide concluduntur: sin posterius; cellulas adiposas, nec non musculorum interstitia imbuunt. Collectionem dignoscis, abdominis alterum latus premendo, alterum immotâ manu tangendo fluctuationem percipiens; ne tamen hoc signo in errorem inducaris, ventrem talitris percute, quibus aquæ columnarum instar in oppositò latere manum tangentem percellent. Cystidem peculiarem indicat solita urinæ copia, ac dolor profundior circa regionem cystidis undequaque gravans. Alteram Hydropis speciem manifestat tumens venter, nullum fluctuationis signum edens, cutis pellucida, impressam digito foveam diù retinens, umbilici recessus profundior. Ascite cognito, æger adhuc examinandus, an hepatis aut lienis dolore vexatus fuerit, an durities in alterutro hoc viscere, aut in mesenterio antehac percepta, ut in latere minùs affecto fiat Paracenthesis. Non admittenda, cum dolores continui adsint & assidui, effluentes enim aquas identidem sisterent, imò subindè suffocationis metu ægrotum percellerent. Frustrâ tentari solet in ascite confirmato. Locum habet tantùm, quando brevi tempore ad insignem magnitudinem pervenit tumor, hydragogis, aliisque auxiliis incastrum adhibitis, viribusque adhuc constantibus. Ita Hippocrates statim secare jubet, in eo scilicet qui non febricit, pulmonis ulcere, alviq; fluxu expertus est, corpore non emaciato, ætate florente, & omnino *ὑσπαλaxis*. Si è contrâ ascites jam diù sit congestus, vires conciderint, & viscera labem contraxerint, ut in ascite à scirrho hepatis, aut lienis, aut morbo acuto succedente, frustrâ tentatur Paracenthesis, nulla salutis spes est, imò sæpè anima cum aquâ educitur. Non leviter errant, qui in desperatis eam instituunt.

3

Non sunt ( inquit Celsus ) temerè profananda remedia , quæ multis fuere præsidio. Hisce consideratis , manuum opus aggrediatur Chirurgus. Scalpello, lanceolâ, vel acu perfici operatio potest. Uniuscujusque methodi sola descriptio præstantiori favebit.

### III.

**I**N singulis operationibus tria præcipuè consideranda veniunt, apparatus dispositio, situs ægrotantis, & locus operationi dicatus. Apparatus instrumenta, nempe scalpellum, cannulam, emplastra, penicillos, & fascias exhibet. Situs est in lecti crepidine, vel in sedili aptato. Locus autem in medio spatii umbilicum inter & cristam ossis ilium comprehensus, plerumque designatur; hunc non semel ipsemet umbilicus eminens opportunè monstravit. Cum per umbilicum aquarum evacuationem natura quandoque molitur, creditum est etiam hic eò ducendum esse quò illa vergit. Imò citrà multarum partium solutionem hæc umbilici punctio. Non inter umbilicum & pubem sectio illa præscribitur, ne lineam albam, medias latorum abdominis musculorum aponevroses, aut intergerinos rectorum tendines fortè lædat. Nunc operandi ratio narranda. Partis designatæ cutem auxiliante ministro tendit Chirurgus, transversâ sectione ad musculos usque scalpello dividit. Hic non anceps eligitur, ut ipsum impune tegere queat digitus index cuspidem instrumenti directurus. Sectâ cutē, ac superiore vulneris labro fursùm ( ut facilius postea consolidetur ) deducto, musculi ac peritonæum inciduntur, cavendo ne omentum vel intestina lædantur. Vulneri cannula inseritur aurea, argentea, plumbea, aut stannea, aliquantulum incurva, magnitudinem calami scriptorii adæquans, eâ longitudine, ut ultrâ peritonæum transeat, non verò majori, ne partibus internis sit molesta; recurvatis etiam labris, ne tota intus delabatur. Per hanc aquas sensim educendas esse suadet, non affluenter, neque repente, sed per plures dies pro ratione virium, pulsu tactuque explorandarum. Observatur hic magni Hippocratis effatum : Quicumque suppurati, aut aquam inter cutem patientes, uruntur aut secantur, si pus aut aqua univèrsim effluerit, omnes moriuntur. Eductis aquis, vulnere spongiâ obturato pulvilli gradatim apponuntur, fasciis ventrem ambientibus detinentur. Per plures dies spongia relinquitur, donec sensim ac paulatim omnis exstillaverit humor. Interea viribus ægrotantis prospicitur alimentis boni succi, faciliisque coctionis, & tandem vulnus more solito curatur.

### IV.

**I**N alterâ Paracenthesim instituendi methodo, lanceola, stylus, & fistula apparatus componunt. Lanceola venis aperiendis adhiberi solita eligitur, quæ ad medias usque cum laminæ, tum manubrii partes lin-

teo, ne inter operandum vacillet, involvitur. Stylus teres sit ac tenuis. Fistula sive tubulus stylo adæquatè conveniat, ut alterius per alterum facilis sit trajectus, & utriusque tuta per vulnus introductio. Apparatu sic disposito, & ægro in sedili aptè locato, minister, vel quipiam alius à tergo constitutus, utrâque manu tumentem ventrem anteriora versus urgeat, dum Chirurgus abdominis eandem ferè particulam, ac in primâ methodo ad peritonæum usque lanceolâ dividit. Veteres qui umbilico propiùs sectionem esse factam dixerunt, facile excusabis, si illos non de ventre tumido, sed depleto locutos esse intellexeris; tunc enim tensione cutis ac musculorum cessante, multò minor vulneris ab umbilico erit distantia. Lanceolâ in cavum ventris, non profundè, ne lædantur interanea, sed superficie tenùs adactâ, aquæ statim profluentes, operationem ex voto factam indicant. Ad latus instrumenti, tantisper in vulnere relinquendi, stylus in abdomen placidè immitendus; tùm extractâ lanceolâ, tubus ope styli, quem ambiat, etiam in ventris cavum pertingat. Extracto denique stylo sive specillo, per tubulum sit aquarum effluxus, non quidem simul & semel, metu, ne subitus à summâ repletionem ad extremam inanitionem transitus vires ægrotantis prosterнат. Omne nimium, id est, multum (inquit Hippocrates) naturæ est inimicum, quod verò paulatim sit, tutum est. Aquis ad libitum evacuatis, linamento fistula occluditur, & impositio emplastro adstringente, penicilla spiritu vini aliove liquore subtili imbuta gradatim applicantur, mantili fasciisque humeros amplectentibus appositè continenda. Elapsis aliquot diebus, remoto obturamento aquæ iterùm educantur, & eodem sistuntur apparatu. Educto ita per vices omni sero, vulnus remedio communi vel iponte coalescit.

## V.

**A**CU, penicillis, & mantilibus tertix Paracenthesis apparatus absolvitur. Acus, Gallicè *Trois carts*, instrumentum est, veruculi teretis figuram referens, cujus extremitas altera manubrio infixæ est, altera triangulo mucrone acuta; fistulâ crassitudine ejusdem accommodatâ conclusum, verùm aliquantò breviori, ita ut cuspis extrâ promineat. Intus exquisitè polita sit fistula, ne inter operandum extrahendæ acui asperitudo obstet. Caput ejus latum, planum, & orbiculatum erit, ut digitis aptè tractari possit extrahenda fistula; vel etiam cochlearis instar recurvum, ut effluentibus aquis diverticulum sit, nè segnius labentes ægroti corpus perfundant. Paratis omnibus, ipsa Paracenthesis sequenti modo administranda. Æger vel commodè sedeat, vel in extremâ decumbat spondâ. Adstantium vel unus, vel plures admotis retrò & utrinque manibus abdomen antrorsum ac sensim cogant; partim ut ad locum punctiioni destinatum colligantur aquæ, & ritè evacuentur, partim ut peritonæum aquis ad extus propulsus ab intestinis distet, & absque ipsorum noxâ perforetur. Tùm Chirurgus aculeum fistulâ munitum, illito prius oleo, inter digitos

indicem & medium ita detineat, ut volâ manus innitatur instrumenti manubrium, cujus mucro in ventrem obliquè protrudatur, & ad cavam usque regionem penetret; deinde acum depromat è fistulâ, hanc verò abdomini infixam relinquat, ut faciliùs exeant aquæ, & ad vas humi positum determinari queant. Inter hæc Chirurgus, ministri, aut alii adstantes ventrem magis magisque comprimant, ut aquæ per apertam ipsis viam indefinenter eliminentur. Hac etiam compressione musculi epigastrici partesque aliæ nimium laxæ ad se se invicem admoventur; atque cavetur, ne evacuatis aquis, præcipiti lapsu diaphragmatis respiratio deficiat, & æger syncope mortem non rarò nunciante corripiatur. Si effluentes aquæ non liberè satis manant, vel planè sistuntur, per cannulam stylus extremitate globosus introducitur, ut epiploon vel intestina aquis exitum denegantia dimoveantur. Ægrotus exeuntibus aquis immotus sedeat, calidis fovendus mantilibus, ne frigescat, & quod magis infausum est, tussiat. Aquis omnino evacuatis eximatur cannula, vulneri penicilla spiritu vini simplici tepidè aspersa imponantur, quadruplicatis linteis eodem liquore madefactis tegenda, ac tandem mantili duplicato totum abdomen cingente fasciisque humeros amplectentibus firmanda. Præscribenda erunt alimenta & cardiaca ægotanti, ut de novo recreari possit. Elapsis tribus aut quatuor horis linteæ denuò constriuantur; idque sensim per intervalla repetatur, donec musculis & visceribus pristinus tonus omnino restituatur. Solâ trium operandi methodorum expositione satis superque elucet, illam, quæ acu fit, præstantiorem esse. In prioribus quantus apparatus, quot sectiones, quot vulnera, quanta sæpè curandi difficultas, imò quoties periculum ab acriori ferro, gangrænâ festis non rarò minitante partibus, imò ulcera & immediabiles sæpè fistulas moliente! Acus autem nostra uno ictu celeri, exiguo ac sponte sanabili rem omnem absolvit, adeoque, citò, tutò, jucundè.

*Ergò tutius ab Acâ, quàm Scalpello, & Lanceolâ Paracenthesis.*

Domini Doctores disputaturi.

|                                      |   |  |
|--------------------------------------|---|--|
| M. Guillelmus - Josephus de l'Epine. | M. Nicolaus le Roi de Saint Aignan.                                       | M. Petrus Marais.  |
| M. Ludovicus - Hieronymus Cossier.   | M. Agidius Adam.  | M. Joanne-Baptista Dodart, Regi à sancioribus Consiliis, Archiatrorum Comes. |
| M. Ludovicus le Thicullier.          | M. Camillus Falconet, Regiæ utriusque Aulae Equestris Medicus Ordinarius. | M. Philippus Donté, antiquus Facultatis Decanus.                             |

Proponebat Parisiis JOACHIMUS-JOANNES COSTAR,  
Parisiinus, Baccalaureus Medicus, A. R. S. H. 1726.  
à sextâ ad meridiem.

Typis PHIL. NIC. LOTTIN, Saluberrimæ Facultatis Medicinæ Typographi, viâ  
San-Jacobæ, ad insignæ Veritatis.